



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“ broj: 95/12 i 41/16), člana 25. Pravilnika o godišnjim finansijskim izvještajima političkih stranaka („Službeni glasnik BiH“ broj 96/13 i 89/16) i člana 18. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“ broj 103/08), izdajem

IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2016. GODINU I POSTIZBORNOG FINANSIJSKOG IZVJEŠTAJA - LOKALNI IZBORI 2016. GODINE **HRVATSKE DEMOKRATSKE ZAJEDNICE BOSNE I HERCEGOVINE**

Broj: 03-07-6-567/17
Sarajevo, 30. juli 2018. godine

S A D R Ž A J

MIŠLJENJE	3
1. UVOD	4
2. PREDSTAVLJANJE POLITIČKE STRANKE	4
3. OPIS REVIZIJE	5
Predmet revizije	5
Cilj revizije.....	5
Obim revizije	5
4. PRETHODNE KONTROLE I REVIZIJE	5
5. NALAZI I PREPORUKE REVIZIJE	6
5.1 NALAZI.....	6
5.2. PREPORUKE.....	9

MIŠLJENJE

Služba za reviziju finansiranja političkih stranaka izvršila je reviziju finansijskih izvještaja Hrvatske demokratske zajednice Bosne i Hercegovine za 2016. godinu, i to: godišnjeg finansijskog izvještaja za 2016. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2016. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka i člana 15.10 Izbornog zakona Bosne i Hercegovine, te uspostavljanje efikasnog sistema internih kontrola.

Naša odgovornost je da izrazimo mišljenje na osnovu revizije koju smo izvršili.

Reviziju smo izvršili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garanciju da je stranka postupala u skladu sa odredbama Zakona o finansiranju političkih stranaka.

Revizija je na osnovu uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

Revizijom godišnjeg finansijskog izvještaja za 2016. godinu, utvrđeno je da je Hrvatska demokratska zajednica Bosne i Hercegovine prekršila odredbe člana 4. stav (1), člana 6. stav (2), člana 11. stav (1) i člana 12. stav (1) i (4) Zakona o finansiranju političkih stranaka.

Prema našem mišljenju, osim navedenog, revidirani finansijski izvještaji ukazuju da je Hrvatska demokratska zajednica Bosne i Hercegovine u 2016. godini postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona Bosne i Hercegovine.

1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je reviziju finansijskih izvještaja Hrvatske demokratske zajednice Bosne i Hercegovine za 2016. godinu, i to: godišnjeg finansijskog izvještaja za 2016. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2016. godine.

Revizija je preduzeta u skladu sa članom 10. stav (1) Zakona o finansiranju političkih stranaka, članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja za 2016. godinu, Hrvatska demokratska zajednica Bosne i Hercegovine se finansirala iz sljedećih izvora¹:

R/B	Izvori finansiranja	Iznos (KM)	Struktura (%)
1.	Članarina	79.526,09	4,19
2.	Prilozi fizičkih lica (3-a)	94.539,79	4,98
3.	Prilozi pravnih lica (3-b)	24.650,00	1,30
4.	Prihodi od imovine (3-c)	7.067,88	0,37
5.	Prihodi od dobiti preduzeća u vlasništvu političke stranke (3-d)	0,00	0,00
6.	Prihodi od poklona (3-e)	1.008,00	0,00
7.	Prihodi iz budžeta (3-f)	1.685.155,56	88,73
8.	Prihodi od propagande (3-g)	0,00	0,00
I	Ukupni prihodi (1-8)	1.891.947,32	99,62
II	Ostali prihodi i drugo	7.230,91	0,38
	Izvori finansiranja (I+II)	1.899.178,34	100,00

U godišnjem finansijskom izvještaju stranka je iskazala rashode u ukupnom iznosu od 1.765.320,02 KM².

2. PREDSTAVLJANJE POLITIČKE STRANKE

Naziv političke stranke je Hrvatska demokratska zajednica Bosne i Hercegovine. Skraćeni naziv stranke je HDZ BiH.

Hrvatska demokratska zajednica Bosne i Hercegovine je, Rješenjem broj: R-I-23/90 od 06.09.1990. godine, upisana u registar Višeg suda u Sarajevu. Politička stranka je 2001. godine promijenila sjedište, pa je Rješenjem broj: R-1/2001 od 03.09.2001. godine, te izmjenama rješenja od 26.02.2002. godine, 28.05.2003. godine, 23.06.2005. godine i

¹ Podaci o izvorima finansiranja su preuzeti iz korigovanog finansijskog izvještaja, koji je stranka dostavila Centralnoj izbornoj komisiji BiH uz očitovanje na Preliminarni izvještaj o reviziji godišnjeg finansijskog izvještaja za 2016. godinu i postizbornog finansijskog izvještaja - lokalni izbori 2016. godine

² Podaci o troškovima su preuzeti iz korigovanog finansijskog izvještaja

rješenjem broj: R/1-09 od 01.10.2009. godine upisana u registar kod Općinskog suda u Mostaru.

Sjedište političke stranke je u Mostaru, ulica Kneza Domagoja bb.

Lice ovlašteno za zastupanje stranke je Dragan Čović, predsjednik stranke.

Lice ovlašteno za podnošenje finansijskih izvještaja za 2016. godinu je Marica Jurić.

Prema podacima iz godišnjeg finansijskog izvještaja za 2016. godinu, organizacionu strukturu Hrvatske demokratske zajednice BiH čine:

- Središnji ured HDZ BiH Mostar,
- 9 kantonalnih/županijskih odbora HDZ BiH,
- Gradski odbor HDZ BiH Mostar
- 62 općinska odbora HDZ BiH i
- Zajednica žena "Kraljica Katarina Kosača".

3. OPIS REVIZIJE

Predmet revizije je godišnji finansijski izvještaj Hrvatske demokratske zajednice Bosne i Hercegovine za 2016. godinu i finansijski izvještaj za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2016. godine, i to sljedećih organizacionih dijelova političke stranke:

- Središnjica HDZ BiH Mostar,
- Kantonalni/županijski odbor Hercegovačko-neretvanskog kantona HDZ BiH Mostar,
- Kantonalni/županijski odbor Srednjobosanskog kantona HDZ BiH Busovača,
- Kantonalni/županijski odbor Zapadnohercegovačkog kantona HDZ BiH Široki Brijeg i
- Kantonalni/županijski odbor Hercegbosanskog kantona HDZ BiH Livno.

Cilj revizije je da se na osnovu provedenih revizijskih procedura pribave revizijski dokazi, koji će revizoru omogućiti da izrazi mišljenje o tome da li je Hrvatska demokratska zajednica Bosne i Hercegovine u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona BiH.

Obim revizije finansijskih izvještaja Hrvatske demokratske zajednice Bosne i Hercegovine obuhvata kontrolu finansijske dokumentacije i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na priloge fizičkih i pravnih lica, prihode iz budžeta i troškove izborne kampanje.

4. PRETHODNE KONTROLE I REVIZIJE

Služba za reviziju obavila je reviziju i pregled finansijskih izvještaja Hrvatske demokratske zajednice Bosne i Hercegovine u periodu od 2004. do 2015. godine, nakon čega su izdati izvještaji o reviziji, odnosno izvještaji o pregledu sa nalazima revizije, mišljenjem revizora i preporukama stranci.

Nakon izvršenog pregleda godišnjeg finansijskog izvještaja za 2015. godinu, Služba za reviziju je izdala Izvještaj o pregledu sa mišljenjem revizora, nalazima revizije i preporukama stranci da, u skladu sa članom 6. stav (2) Zakona o finansiranju političkih stranaka, dobrovoljne priloge u novcu uplaćuje na transakcijski račun Središnjeg ureda stranke.

Nerealizovane preporuke:

Na osnovu uočenih nedostataka u godišnjem finansijskom izvještaju za 2016. godinu, utvrđeno je da Hrvatska demokratska zajednica Bosne i Hercegovine nije ispoštovala preporuke revizije.

5. NALAZI I PREPORUKE REVIZIJE

5.1 NALAZI

a) Hrvatska demokratska zajednica Bosne i Hercegovine nije postupila u skladu sa odredbama člana 4. stav (1) Zakona o finansiranju političkih stranaka³.

Revizijom finansijskog izvještaja i finansijske dokumentacije utvrđeno je da je politička stranka troškove plaća i naknada, humanitarne rashode i troškove održavanja opreme ostvarila u većem iznosu za 108.996,89 KM u odnosu na Program utroška sredstava za 2016. godinu, koji je sačinila 19. februara 2016. godine, te isti dostavila Centralnoj izbornoj komisiji BiH.

- Programom utroška sredstva Hrvatska demokratska zajednica Bosne i Hercegovine je planirala bruto plaće zaposlenih, naknade za topli obrok, prevoz i druge naknade u iznosu od 460.000,00 KM⁴. Navedene troškove stranka je ostvarila u iznosu od 510.338,10 KM i to: troškove bruto plaća u iznosu od 328.911,72 KM, naknade za topli obrok, prevoz na posao i s posla u iznosu od 90.982,08 KM i troškove po ugovorima o djelu u iznosu od 109.583,10 KM⁵, što je iskazala i u finansijskom izvještaju, koji je podnijela Centralnoj izbornoj komisiji Bosne i Hercegovine.
- Hrvatska demokratska zajednica Bosne i Hercegovine je programom utroška sredstava planirala humanitarne rashode u iznosu od 125.000,00 KM. Po tom osnovu stranka je isplatila sredstva u iznosu od 166.797,20 KM, što je za 41.797,20 KM više od planiranog iznosa.
- Troškove tekućeg održavanja opreme stranka je ostvarila u većem iznosu od planiranog za 16.861,59 KM. Troškove koje je stranka planirala u iznosu od 6.500,00 KM, u finansijskom izvještaju je iskazala u iznosu od 25.726,86 KM, iako je iste ostvarila u iznosu od 23.361,59 KM⁶.

b) Hrvatska demokratska zajednica Bosne i Hercegovine je prekršila odredbu člana 6. stav (2) Zakona o finansiranju političkih stranaka.

Revizijom je utvrđeno da prilozi fizičkih lica u iznosu od 15.722,29 KM i prilozi pravnih lica u iznosu od 19.300,00 KM nisu uplaćeni na transakcijski račun Središnjeg ureda stranke.

³ U skladu sa odredbom iz člana 4. stav (1) Zakona o finansiranju političkih stranaka, stranka finansijska sredstva iz člana 3. stav (1) ovog Zakona može koristiti isključivo za ostvarivanje ciljeva utvrđenih svojim programom i statutom

⁴ Osoba ovlaštena za vođenje poslovnih knjiga i podnošenje finansijskih izvještaja je tokom revizije izjavila da su okviru navedenog iznosa naknade za ugovore o djelu i ugovore o povremenim i privremenim poslovima.

⁵ U okviru navedenog iznosa 19.138,80 KM je paušal dvojice političkih tajnika Kantonalnog/županijskog odbora Srednjobosanskog kantona HDZ BiH Busovača

⁶ Nabavka četiri autogume po pojedinačnoj cijeni od 591,32 KM (ukupno 2.365,27 KM) evidentiran kao trošak održavanja opreme.

U skladu sa odredbama člana 6. stav (2) Zakona o finansiranju političkih stranaka, dobrovoljni prilozi u novcu uplaćuju se na transakcijski račun centrale političke stranke⁷.

c) Hrvatska demokratska zajednica Bosne i Hercegovine prekršila je odredbe člana 11. stav (1) i člana 12. stav (1) i (4) Zakona o finansiranju političkih stranaka⁸.

Revizijom je utvrđeno da dio evidencija o rashodima političke stranke nije blagovremeno uspostavljen, dio poreznih rashoda nije evidentiran, pa samim time i godišnji finansijski izvještaj koji je stranka podnijela Centralnoj izbornoj komisiji Bosne i Hercegovine nije popunjen u skladu sa odredbama Pravilnika o godišnjim finansijskim izvještajima političkih stranaka.

- (1) U postizbornom finansijskom izvještaju politička stranka je iskazala troškove izborne kampanje u iznosu od 287.898,78 KM, dok je iste troškove u godišnjem finansijskom izvještaju iskazala u iznosu od 324.141,56 KM, što ukazuje na neblagovremenost evidencija.
- (2) Politička stranka je isplatila sredstva fizičkim licima u iznosu od 35.982,17 KM, koja imaju karakter ličnih primanja, na koja je sa poreznog aspekta bila obavezna obračunati i uplatiti porez i doprinose, pa ih kao trošak iskazati u poslovnim knjigama i finansijskom izvještaju.
 - Politička stranka je 08.08.2016. godine uplatila Federalnom zavodu PIO/MIO iznos od 18.552,17 KM, kao razliku doprinosa iz ranijeg perioda za osobu koja je kao uposlenik stranke penzionisana/umirovljena krajem 2015. godine. U poslovnim knjigama stranke iz ranijeg perioda i finansijskim izvještajima ta obaveza nikada nije iskazana. Činjenica da obaveza za doprinos nije evidentirana ranije, te da je u momentu isplate sredstava Federalnom zavodu PIO/MIO, radi uvezivanja radnog staža uposlenika za neki raniji period, evidentirana kao ostali rashod nedvosmisleno je utvrđeno da sredstva u iznosu od 18.552,17 KM, imaju karakter ličnog primanja fizičkog lica, te su ista oporeziva u skladu sa poreznim propisima.
 - Od sredstava koje je KO/ŽO Srednjobosanskog kantona HDZ BiH Busovača, u iznosu od 45.510,00 KM utrošio u humanitarne svrhe, dio sredstava, u iznosu od 14.700,00 KM ima karakter ličnih primanja fizičkih lica, na koja je stranka bila dužna obračunati i uplatiti porez na dohodak i pripadajuće doprinose. Isplaćena su sredstva fizičkim licima za jednokratne finansijske pomoći u iznosu od 4.500,00 KM, koja na osnovu raspoložive dokumentacije ne mogu biti oslobođena poreza i doprinosa. Također, sredstva koja su u skladu sa Odlukom, broj: ŽO HDZ-202/16 od 27.12.2016. godine, Odlukom broj: ŽO HDZ-169/16 od 16.11.2016. godine i Odlukom broj: ŽO HDZ-117/16 od 1.9.2016. godine isplaćena kao jednokratne finansijske pomoći studentima u iznosima po 400,00 KM za 22 studenta, ukupno 8.800,00 KM i pomoći za

⁷ U skladu sa odredbama iz člana 5. stav (4) Zakona o finansiranju političkih stranaka, članarinu i dobrovoljne priloge ovlašteno lice u u političkoj stranci uplaćuje na transakcijski račun političke stranke najkasnije u roku od 10 dana od dana prijema uplate.

⁸ U skladu sa odredbom člana 11. sta (1) Zakona o finansiranju političkih stranaka, politička stranka je dužna voditi poslovne knjige u skladu sa računovodstvenim propisima. U skladu sa odredbom iz člana 12. stav (1) Zakona dužna je uspostaviti evidencije o svim prihodima i rashodima, dok je u skladu sa odredbom iz člana 12. stav (4) dužna podnositi finansijski izvještaj u formi koju odobri Centralna izborna komisija Bosne i Hercegovine.

školovanje dva lica u iznosu od 1.400,00 KM, nemaju karakter stipendija, pa su ista oporeziva.

- Revizijom je utvrđeno da je KO/ŽO Hercegbosanskog kantona HDZ BiH Livno putne troškove, u iznosu 2.730,00 KM, isplatio fizičkim licima koja nisu bila uposlenici stranke, pa su ista oporeziva u skladu sa Zakonom o porezu na dohodak.
- (3) Revizijom su utvrđeni nedostaci kod računa dobavljača, koji su knjigovodstvene isprave o nastalim poslovnim događajima. U skladu sa računovodstvenim propisima, sadržaj knjigovodstvene isprave mora nedvojbeno i vjerodostojno pokazivati vrstu i obim nastale promjene (kupovina, količina, cijena, ukupan iznos), karakter poslovne promjene u knjigovodstveno-tehničkom smislu, tehnička obilježja i sl.
- Na računu Hotela Mostar d.o.o. Mostar, broj: 1434/2016 od 18.11.2016. godine za usluge smještaja 30.10.2016. godine i računu broj: 1494/2016 od 30.11.2016. godine za usluge smještaja 30.11.2016. godine, umjesto broja osoba koje su koristile usluge hotela, navedena je količina jedan (1) po cijeni od 740,80 KM na prvom računu, i količina jedan (1) po cijeni od 920,00 KM na drugom računu. Za konzumacija jela i pića, takođe je navedena količina jedan (1) u iznosu od 1.300,80 KM⁹.
 - Na računu pravnog lica Binvest d.o.o. Posušje, broj: 2016-12545 od 03.10.2016. godine faktirisane su 53 bačve piva po 30 litara (ukupno 1.590 litara) u iznosu od 3.948,50 KM. Iako je na navedenom računu predviđen potpis isporučioća robe, kontrolora, vozača i osobe koja je preuzela robu, potpisi nedostaju, a ne postoje ni drugi dokazi da je roba preuzeta od strane političke stranke.
 - Elementi koji potvrđuju vjerodostojnost knjigovodstvene isprave (potpis osobe koja je primila robu, odnosno kontrolisala nabavku) nedostaju i kod računa preduzeća Europapier-Herceg tisak d.o.o. Široki Brijeg, broj: 01-17444 od 12.12.2016. godine, na iznos od 2.371,68 KM. Na računu je faktirisano 40 kožnih novčanika u vrijednosti 1.799,46 KM, čija je jedinična cijena 40,95 KM i 64,35 KM.
 - Na računu preduzeća M.R.M. Export-import d.o.o. Ljubuški broj: I21-020-103/16-s fakturisana je nabavka četiri autogume po cijeni 591,32 KM po komadu, što ukupno iznosi ukupno 2.365,27 KM. Račun ne sadrži potpis osobe koja je preuzela gume, niti druge ovlaštene osobe koja je kontrolisala nabavku. U knjigovodstvenim evidencijama pomenuta nabavka je iskazana kao trošak održavanja opreme, a ne nabavka, odnosno trošak autoguma.
- (4) Kod blagajničke dokumentacije i blagajničkih izvještaja Kantonalnog/županijskog odbora Hercegbosanskog kantona HDZ BiH Livno utvrđeni su određeni nedostaci. Blagajnički izvještaji nisu potpisani od strane ovlaštenih osoba, što nije u skladu sa principima blagajničkog poslovanja.
- d) Hrvatska demokratska zajednica Bosne i Hercegovine izbornu kampanju nije finansirala sa transakcijskog računa koji je, u skladu sa članom 4.4 Izbornog zakona BiH, prijavila Centralnoj izbornoj komisiji BiH prilikom podnošenja zahtjeva za ovjeru za izbore.**
- Od ukupno ostvarenih troškova izborne kampanje, u iznosu od 324.141,56 KM, sa računa Središnjice stranke, koji je prijavljen u skladu sa članom 4.4 Izbornog zakona BiH,

⁹ Na računima koje Hotel Mostar d.o.o. Mostar ispostavlja drugim korisnicima (CIK BiH), navedena je vrsta usluge, broj korisnika usluge i njihova imena.

finansirani su troškovi samo u iznosu od 21.777,07 KM. Središnjica stranke je, u skladu sa Odlukom broj: I-02-076/16. od 30.08.2016. godine, sa prijavljenog računa za finansiranje izborne kampanje, isplatila sredstva nižim organizacionim dijelovima stranke u iznosu od 30.760,00 KM, na ime jednokratnih potpora za finansiranje izborne kampanje za Lokalne izbore 2016. godine.

- Niži organizacionin dijelovi stranke izbornu kampanju su finansirali, putem svojih transakcijskih računa, u iznosu od 302.364,49 KM.

Troškovi izborne kampanje

Prema odredbama člana 15.10 Izbornog zakona Bosne i Hercegovine, politička stranka za potrebe izborne kampanje ne smije potrošiti više od 0,30 odnosno 0,20 KM¹⁰ po biraču u svakom izbornom krugu, prema broju birača koje je objavila Centralna izborna komisija BiH. Prema podacima Centralne izborne komisije BiH, na osnovu broja birača, Hrvatska demokratska zajednica Bosne i Hercegovine je mogla potrošiti 712.382,38 KM. Politička stranka je u godišnjem finansijskom izvještaju, koji je podnijela Centralnoj izbornoj komisiji BiH, u svrhu izborne kampanje iskazala troškove u iznosu od 324.141,56 KM.

5.2. PREPORUKE

Preporučuje se Hrvatskoj demokratskoj zajednici Bosne i Hercegovine da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da finansijska sredstva osigurana za finansiranje političke stranke koristiti isključivo za ostvarivanje ciljeva utvrđenih svojim programom i statutom,*
- *da dobrovoljne priloge u novcu uplaćuje na transakcijski račun središnjeg ureda stranke,*
- *da poslovne knjige vodi u skladu sa računovodstvenim propisima i da obrati pažnju na ispravnost i vjerodostojnost knjigovodstvenih isprava,*
- *da uspostavi blagovremene i potpune evidencije o rashodima, te obrati pažnju na troškove po osnovu poreza i doprinosa na isplate koje imaju karakter ličnih primanja,*
- *da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka i*
- *da troškove izborne kampanje finansira sa računa koji prijavi u skladu sa članom 4.4 Izbornog zakona BiH.*

¹⁰ Član 15.10 stav 2. Izbornog zakona Bosne i Hercegovine propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

KOMENTAR:

Hrvatska demokratska zajednica Bosne i Hercegovine se u datom roku očitovala na Preliminarni izvještaj o reviziji godišnjeg finansijskog izvještaja za 2016. godinu i postizbornog finansijskog izvještaja – Lokalni izbori 2016. godine.

U skladu sa odredbom člana 14. stav (3) Zakona o finansiranju političkih stranaka, politička stranka je dobrovoljno otklonila neke od nedostataka, koji su navedeni u preliminarnom izvještaju, o čemu je dostavila relevantne dokaze, dok je neke od nalaza osporila. U skladu sa navedenim, Služba za reviziju je uvažila ispravku nedostataka u finansijskom izvještaju i uvažila naknadno dostavljene dokaze, pa je nalaze iz preliminarnog revizijskog izvještaja: da stranka nije prijavila nenovčanu donaciju, da je ostvarila zabranjeni prilog u iznosu od 500,00 KM, da nije prijavila promet po transakcijskom računu jednog općinskog odbora, da nije tačno iskazala prihod iz budžeta njena tri organizaciona dijela i da nije iskazale tačne troškove zakupnine kod tri organizaciona dijela, korigovala u konačnom izvještaju revizije.

Izmjena Plana- programa utroška sredstva iz decembra 2016. godinu, koju je stranka dostavila uz očitovanje na preliminarni izvještaj revizije, a istu nije predočila revizorima tokom obavljanja revizije, ne može se smatrati relevantnim dokumentom. Izmjena plana je sačinjena na kraju godine, tako što su u plan unešeni ostvareni troškovi, koji značajno odstupaju od Programa utroška, koji je stranka sačinila u februaru 2016. godine.

Primjedbe stranke na nalaz revizije o neobračunatim i neiskazanim porezima na lična primanja nisu uvaženi obzirom da stranka nije dostavila nove dokaze, koji bi uticali na nalaz revizije. Primjedbe stranke na nalaze revizije u vezi vjerodostojnosti knjigovodstvenih dokumenta, nisu uvažene, pa su nalazi revizije iz preliminarnog izvještaja u tom dijelu nepromijenjeni.

Zahvaljujemo se osobi ovlaštenoj za finansijske izvještaje, na korektnoj saradnji tokom obavljanja revizije finansijskih izvještaja.

Pomoćnik revizora

Šef Službe za reviziju, revizor

Mr. sc. Goran Cicović

Mr.sc. Hasida Gušić